

成化丙午修志姓氏

知縣李 咨

邑人范 晟

隆慶戊辰脩志姓氏

知縣宋之韓

邑人趙景祿

王 騰

吳 崇

李 蘭

高 魯

趙夢弼

杜 綬

崔 泉

吳 肯

康熙癸丑修志姓氏

知縣謝國傑

邑人崔瀛

喬運閔

王升秀

趙鴻漸

崔爾瞻

張鳳儻

張鉞

雍正壬子修志姓氏

司修

知縣趙懋本

舜勗順天大興人

同修

教諭鄧兆鳳

苞九靈邱人

訓導景九錫

晉公芮城人

鑒修

典史張

涵

澤寰順
天人

纂修

邑人盧秉純

性香

叅閱

邑人程

昶

暉明

王

梅

羹臣

張

卯

見仁

分纂

邑人喬瑞圖 滄洲

叅訂

邑人劉漢文 天章

王國瑞 子玉

徐宏 任可

黃旌畧 著三

朱永年 資訓

編次

邑人盧玠 君錫

王賓予 德佑

張冲極 拱辰

較閱

邑人許成漢

端士

正訛

邑人盧敬升

天誠

訂正

邑人賈璋

平玉

徐遜士

簡在

柴惟馨

桂園

柴友逋

梅仙

張泰來

陸交

劉居敬

翼長

司刊

邑人張

璣

在璿

李治國

平侯

繪圖

邑人郭拱翼

次張

協理

邑人安

寅

定夫

舊序

明李咨邑令

人謂志爲紀事之書不可不作也夫固不可以無作亦不可以徒作以其足以紀一邑之山川之疆域之職貢人文之類耶此固不容於不作矣然其灼去取別詳畧等輕重而得夫體要焉者是豈可徒作矣乎襄陵故志手藁十數葉不知昉於何時而作於何人中間該載者纔城郭官寺田賦之數事耳且多脫落闕典曠時似有待而然也廼於視事之讌謀及儒學師生相與肆考古

今傳記博采圖經誌典質諸故老士夫見聞間附已意
電勉從事越三月而告成爰分一十九卷用鏡諸梓俾
游覽者一展閱間有以知夫斯土風俗之美人物之雅
貨殖之豐與凡襄之所有無不燦然於目則是編之作
於是邑似有毫髮之補矣第念萬卷非鄴侯秘書非世
南兼之桑田滄海事蹟漶漫一時之考究容有未精去
取容有未當詳畧容有未審輕重容有未倫掛一漏百
殆未免夫徒作之誚也雖然測海飲河憑依分願姑書

此以俟後之博雅者續教焉

序

索 膚

教諭

成化壬寅春進士故城李侯來補襄陵令再明年政通
廢舉乃有事於縣志而膚及邑之士范晟者幸在考核
列書既成謂膚宜序其後膚聞物之顯也有時而事之
成也有數是志之作雖曰人力之所爲若無預於時與
數者然其間或愛惡之不齊或事勢之相戾似亦不能
不有待於時與數焉不然則平陽屬地爲州者五爲縣

者廿有四襄陵風土文物甲他處何其宜顯而久不顯也然則是志之所作將謂爲令者無人耶則前此者華亭薛侯德良歷城張侯用和皆以文章政事名雖嘗銳意於斯然終以弗久其任不果將謂世經多故耶則吾侯自下車來洵值凶年政務繁劇他之爲守若令者竭心力以拯一時之危且不暇前此之年未聞有如是之急者而吾侯是志竟成於此用是觀之則睿所謂必有待於時與數者果真也耶雖然天下事待乎人爲者什

九待乎時數者什一吾侯是志之成雖不能不有待於時數亦豈必有待於時數也哉

序

呂調元 教諭

郡邑有志猶列國有史所以彰往昭來貴實錄也襄邑舊志自成化丙午漳南李公纂述成帙今幾百年未經詮次其間政治之興革城郭之增遷物產之豐耗按圖考跡名實相戾究其大雖名宦鄉賢接踵而興咸未登記識者憫之嘉靖乙丑敬齋宋公來宰是邑識達天人

學窮今古朞月而化行再踰歲適今上嗣位百廢俱舉
庶政維新公覽邑志之未備竊有憂焉廼命余偕分教
薛君周君鄉先生趙君及諸弟子員萃一館舍欲以博
求聞見檢蒐故實沿舊增新纂茲曠典余等承命兢兢
冰惕罔不昕夕咨度叅互考訂祇服匪懈務求確當甫
踰旬而一邑之事跡頗具集錄呈公公卽指示綱領剖
析類例正是非之分定取舍之極酌衆論而出真見於
是缺者增繁者刪訛者易首紀地理繼緝學校而食貨

秩官次之人物藝文又次之展卷披閱星列川流綽有
要歸視昔李公纂述之功倍有光焉梓旣成屬余序諸
首簡余幸際盛遇故不敢以不敏辭廼作而言曰君子
之作志也貴詳而脩而其取人也貴確而精今觀我公
是編之裁正雖地域庶類之槩載而于名宦鄉賢之獨
慎無乃表古以範今章軌而示趨與使後之官于斯生
于斯者或志存經濟而跡邁前脩或身任綱常而踪追
往古寔非有感於今日之綜核賢哲而興起矣乎世有

作者則世受其賜我公斯志之脩其有神於風教大矣
若曰勒方域之宏圖揭今昔之勝概廣聞見而無益於
斯人殊非我公纂述之本意故書之以俟同志

序

國朝
謝國傑

邑令

我

國家治運丕隆車書咸會

聖天子允閣臣請纂輯一統志以昭成軌

詔頒直省郡邑各修紀乘廣資覽擇余不佞備員襄命

捧

上臺檄蚤夜圖維思所以藉手告無罪爰同學博劉君

延邑中紳衿耆老諮焉度焉始以楮筆屬崔君喬文數

輩扃鑰事事浹月帖成取隆慶來百念年未載者續之

且於前之缺者補之冗者芟之信則傳而疑則闕之剝

蝕者完魯魚者辨之余緡披再四竊自勗尤自懼也惟

聖天子採風問謠不遺僻壤襄雖彈丸地星垣分麗水界

山屏有民人有社稷在

聖天子函蓋下開卷而閱輿圖將若何固疆域若何瞻戶
口若何厚風俗建置有志一石一木悉民力之拮据學
校有志一器一物悉士類之觀瞻貢賦有志一粟一絲
悉仰供

國儲而下出自耕織之勤勞長邑者爲民力休恤若何
爲士類振興若何爲

朝廷急徵輸復爲婦子室井灶又若何昔官茲土者或以
廉惠稱或以嚴明著不則僅臚爵里等於泯泯無聞噫

嘻水者物之鑑古者今之鑑示余宜法宜戒者其在官
師一志矣至邑內人物純忠篤孝允足表彰片善微長
俱應闡發旁及技藝之流與夫詩文疏記堪傳者一焉
未備闕畧貽譏司風教者又若何是皆余之責也余敢
不自勗敢不自懼哉今幸矣校讐諸子抽思展帙克慎
克詳余得藉手報憲命告無罪矣舉成帙上之郡上之
省彙而上之

神京知薇署蘭臺必有握青鏤管者俯拾隻字勒之金

義陽縣志 卷序
版則下邑野乘亦以佐

聖天子同文盛治也敬摭淺陋弁之簡端

序

劉宏緒 教諭

余曩署鐸堯山每詣郡城晤襄邑二三良友道其山川
人物輒心嚮往之歲乙巳以改補承乏此地尋見澄巖
翠岫碧澗丹壑一時同人翕聚魚魚雅雅竊意余於此
蓋有夙緣目之所覩無異疇昔之所聞也越明年福寧
謝公琴鶴西來剖符司牧甫下車政平民悅迺於晉接

之餘顧余而言曰風俗之轉易在人情人情之作新在
長吏前之所爲後人之師今之所行他日之鑑撫時紀
事洵守土者之不可緩也茲奉功令允廷臣請脩葺郡
志以成大一統之模適獲我公素心遂屬余不佞共仙
洲崔子洎諸子衿輩杜局校讐且語以愛惜珍重之意
余受事中心怍怍旣竣敢颺言末簡按襄志脩自隆慶
紀元迄今百有餘禩遲之又久未獲縷續者蓋言慎也
夫溯河源而望斗杓趨粵嶺而循指車州邑之有志其

亦巡方問俗之杓車乎披圖而稽如星垣岳瀆城郭建
置以暨賦稅戶口諸條例固皆班班可攷而總不外夫
宦遊之名彥與鄉居之偉儒以爲振興之要故論名宦
則記其筮仕詳其展布有法律與詩書並用風霜偕雨
露兼施判如山而不動門似水以常清者若而人論鄉
賢則綜其家世仰其流風有瑤林玉樹之姿干將莫邪
之幹弓裘克紹棠棣競芳者若而人遞至羽校燭日旌
旗流星之傳寔所以壯國威白雲同悠青松共爽之侶

亦足以標高蹈逮夫孝格天地節映冰霜非不戛戛乎
難之然一念之誠在所必錄皆擗管者所不敢忽也由
是旣存其人復採其言念此言爲心聲文爲國華當其
昭肝胆於日星吐珠璣於楮墨無論爲出師爲陳情爲
弔古寄懷皆有至性行乎其間古今人豈甚相遠哉且
諷吟一道上叶國風詩以山川爲境山川亦以詩爲境
名山遇賦客何異士遇知己一經品題情貌宛然所以
馳熊軾於谷陽歌驪駒於祖道非嚶鳴之誼卽芟棠之

表陽縣志 卷之四
蔭也其疇得而棄之余因是更有思焉雖天下州有九
岳有五旁而至於大荒無垠之鄉謝靈運李太白諸公
所未登躡題咏處皆可從我公愛惜珍重之一念通之
有不難隱几而燎若指掌者太史公所云登龍門探禹
穴便有江山萬里之勢良以此也則今日之舉不大愉
快也哉至我公雉馴郊田鸞棲庭樹徽政不可更僕自
當著聲卓異輝映簡編余且拭目而敬俟之

序

崔瀛邑人

古史中紀傳子長爲優編年君實爲最兩司馬氏皆河東人也繼有作者無能彷彿何今古人相去遠甚余小子謫陋未獲讀石渠天祿之書間嘗披覽簡冊曠世興慕亦竊以無媿古人自期許茲值邑侯謝父師奉憲檄重脩邑志謬以編摹見屬余共諸文學鍵扃受事相矢冰兢思此一邑之乘將資史館採擇而且傳信後世何敢輕易濡筆取舊志再四繙閱乃知境內事例咸宜詳核而尤難尤慎者莫逾於追論昔之官師人物諸如輿

圖貢賦及建置藝文可按圖稽按籍攷偶有未脩罪止
疎畧耳若十百年以前之人由十百年以後論之論其
人之心而論人者之心見焉論其人之品而論人者之
品關焉一字溢美則得罪於名教一言掩善則得罪於
鬼神我得取前人筆之曰某也忠某也廉某也孝義某
也節烈後之人又得取是志而指之曰其論某也直其
論某也曲其論某也公其論某也私其論某也是其論
某也非噫嘻此何許事顧敢輕易濡筆乎用是博詢行

實詳加品騭一字一言務協公論聽雞鳴而攬衣剪燭
花於午夜厯月者再始脫藁成集于舊志仍者半裁繁
辨訛者半自隆慶迄今茲則分例續補其染毫灑墨類
出文學諸君子訂正于庠師鑒定于邑侯余小子廁身
其間折衷寡當極深汗媿於才於學於識無一有焉若
僭若濫若亂庶幾免乎以是上之史館或俯覽而節錄
之則燃藜火搗彤管自有子長君實其人者

序

李 暉
郡守

邑之有志非誇多闕靡之書也蓋欲陳星文之向背氣
候之蚤暮土田之肥瘠戶口之盈縮風俗之醅漓人物
之盛衰城郭祠宇之修廢守令丞簿之賢否以是而獻
之

朝廷布之百司俾有守土之責者相其機宜因其情勢裁
成而左右之以成比戶可封之俗法至良意至美也予
於辛亥歲恭膺

簡命來守平陽十二屬之人物山川固已約畧胷中矣襄

陵趙令以修志上請欲予董率其事予告之曰令亦聞縣之所由名乎縣者懸也一境之精神命脉皆懸於一令之手也且亦聞知縣之所由名乎知者識也一境之隱微曲折皆識於一令之心也知之明處之當邑令之能事畢矣卽予亦得藉手以告無過矣襄陵爲平郡次邑凡所爲星文氣候土田戶口等其懸象於天而成形於地者固無大改於今昔也而所以相天因地致星文之表瑞氣候之均調土田之沃衍戶口之殷實風俗之

醕良人物之秀偉城郭祠宇之堅好守令丞簿之賢能者端在人事之振興耳我

皇上勵精圖治薄海從風久已臻重熙累洽之治矣其奉行德意宣揚教化者則良有司之事與賢薦紳之責也志中所列爲名宦與鄉賢者伊何人哉卽今修志之邑令邑紳均係乎風俗人心之重焉一展卷而得其要會之所存並得其景行之所在則今日之致羨於前人者未必後人不致羨於今日也使徒視爲誇多鬪靡之文

辭而已與予整躬率屬並邑令化民成俗之意夫豈有當哉因次其語於簡端

序

趙懋本
邑令

古者太史掌風詩採四方之歌謠以察爲政之得失風俗之貞淫司徒掌邦土辨九州山川平野之肥瘠以示民播種之宜列國各有史賢則褒而否則貶以示千秋之法戒後世置郡縣遂有一統省郡邑志其詩歌必錄貢賦必詳官師人物必書兼三者之長而用之所係顧

不重且難歟至邑志更有重且難者一統郡省之志患其不簡邑志患其不詳一統郡省之志患其採之過畧邑志患其擇之不實余獨謂一邑之志詳諸志之簡簡而精者也一邑之志實諸志之畧畧而嚴者也誠哉邑志之重且難也余以庚戌之春蒙上憲拔舉

聖天子之簡命改授襄邑甫下車卽取邑志披閱以爲因革損益助自歷代以至康熙癸丑以前之記載得其梗概至癸丑以後蕩然未書竊以襄陵密邇平郡風號陶

唐其間山水形勝之雄生齒土物之盛與夫人物之忠
孝節義文章之挾藻摛華蓋有日新月異彌進而彌上
者况經地震荒祲諸多滄桑其宜續而修之也尤亟敢
不竭蹶從事顧余材愧三長技歎一割簿書鞅掌深以
不勝任爲懼茲歲春歲和民豐郡憲下臨襄邑因邑乘
歷年久遠當急爲重纂命余董其事因集邑紳士謀捐
俸以成是役會太史盧公告假歸里請扁鑰司纂同事
者則司鐸鄧君等分纂則蒲臺程君賢書張君等明經

則劉君王君等文學則賈生盧生喬生等余同諸君盟
之神明質之幽獨取舊志之缺者補之繁者簡之以衷
其當取新事考之校之以求其實余于公餘亦細爲校
讐上報郡憲蒙鑒定集其大成數月告竣分卷二十四
庶乎其詳且實矣竊幸斯邑六十年來沐浴

聖化歌咏太平雖山川如故歲月遷更於城郭見其重新
人民見其蕃殖皆

聖天子賑恤于災禮之時休養於平成之日而生之聚之

者也於官師見其有以循良稱有以明敏著皆膺

簡命以蒞斯土治斯入者也於鄉賢有許主政之醞謹端
正張春曹之清勤任事皆本山嶽之鍾靈文教之培養
者也于忠義孝弟祠或靡監于王事或敦篤乎倫紀或
砥廉隅或勵名節斌斌乎皆一鄉之善士順則之良民
也至於藝文上之載乎道義次亦關乎興廢絕無浮靡
淫哇之聲不失爲朴素之遺焉猗歟盛哉余慨然有思
焉思襄陵民雖貧而儉俗雖朴而良何以使貧者富儉

者禮朴者醕超三代而上媿乎唐虞無負

聖天子加意司牧之至意雖然民之興也視乎上政之成也
也因乎教仁漸義摩之久士民於變物阜財豐亦下邑
宰之光也至若人文蔚起俗登上理又下邑宰之望也
是爲序

序

盧秉純

邑人

襄陵爲平陽次邑密邇堯天依切舜日四表上下格被
獨先芸芸者皆帝世之民也邑之先有老人歌於路曰

日出而作日入而息耕田而食鑿井而飲帝力何有於
我哉此爲陶唐氏之史卽爲陶唐氏之志矣閱四千餘
歲而至今日雖郡邑沿革不一然而出入猶是也作息
猶是也田井猶是耕鑿猶是飲食亦猶是也襄邑之志
卽以老人之歌誌焉奚不可也志輿圖則田與井之所
由畫乎志建置則作與息之所由庇乎志學校則出與
入之大經所以稟承者乎志貢賦則耕與鑿之美利所
以獻納者乎志官師則代帝而宣其力而謀民之飲食

且不止謀民之飲食者乎志人物則計日而程其材而
閑己之出入并不止閑己之出入者乎志襍記志藝文
則靈異之迹不必爲老人之事之推而渾穆之風亦皆
老人之歌之類者乎况夫元會運世皆日與日之所積
而成齊治均平胥帝與帝之相沿而治今固猶是日也
則亦猶是帝耳帝在而輿圖之志且可以參義畫矣
建置之志且可以參有巢矣學校之志且可以參虞庠
矣貢賦之志且可以參禹貢矣官師之志且可以參周

官矣人物之志且可以參高陽之才子雜記之志且可
以參安邑之神鼎藝文之志且可以參太古之結繩矣
一邑者天下之推一代者百代之準此志之作區區襄
陵云爾哉然則幸生堯舜之世幸踐堯舜之土亦但與
爲作息與爲耕鑿與爲飲食焉耳尙不知帝力之何有
於我又焉知當年之歌今日之志之何有於帝力耶

詩

蒙溪山居

五言古

元張著

我本山中人十年墮紅塵歸來媿青山青山解迎人十
里如相望五里如相親乃知山德厚不以俗駕嗔藹藹
桑麻原熙熙雞犬鄰落落冠裳古悠悠言語真回思所
遊地囂埃塞城闔終焉吾有約爲報山之神

憶巢父

明李容邑令

幽壑映晴巒溪水揚新綠言昔有異人而此寄幽獨放

情凌漢霄浮雲等黃屋濯足清冷濱長笑響山谷爲憚
都俞煩甘心友麋鹿聲飛天地間誰能嗣芳躅

咏席師

憶昔陶唐時光岳氣完好生此華封儔結寓山之窈夕
眠松石雲朝歌羲黃道胡爲擊壤歌薄言瀉懷抱噩噩
太古風降世誰同調獨憐荒塚頭離離半秋草

張留侯

睠彼韓公子奮起從高皇氣象固儒匹伊呂同輝光今

古稱人傑明哲真非常
決策來商隱躡足封齊王
功成身勇退健羨良弓藏
下馬拜高墓古樹明夕陽

張蒙溪

門楹夕照明村墟
藹林木蒙溪解組歸
曾此易風俗衣冠不隨時
禮樂教兒讀豈直閨門間
里閤仍修睦遺風尙凜然
後學多私淑弔古拂殘碑
歔歔奠醢醜

張承旨

明明太平關山川遠涵映
公寔間氣鍾草木亦榮幸
有

筆大如椽信史煩刪定鑿坡三十年陰陶多士正操持
冰霜清氣沮金石勁幾度仰高風式木起深敬

牛叅政

纍纍數塚青亭亭一碑古殘刻紀芳馨樵牧知光祖英
英間世才疇能踵遐武寵遇冠時流符佩三珠虎吁嗟
敗壘邊野花自開吐因感雍門言悵望原頭土

東閣晨望

國朝
崔瀛 邑人

晨起望東山旭日散林木深壑靈風响得爽豁幽獨凭

立虛閣上擬構雲間屋記曾披道書凌空飛仙築從此
遠塵氛崖畔留鶴宿

襄陵行

七言古

元王 暉 翰林

暮春庚辰日維丙駕言出遊事耕省西郊微雨半晴陰
幾點殘雲露山頂馬蹄踏破落紅香飛蓋追隨垂柳影
晉人熟食三月節店舍無烟竈厨冷春到襄陵滿縣花
綠陰池館總姚家清樽遠酌會心賞不與鶯燕爭春華
西輪歸輾故堤沙金店西頭酒更嘉舉杯爲憶劉漢事

雲龍風虎何紛拏，偽淵東開蓄峻址。
青衣行酒真驚麕，舉帷一笑雨寂寞。
野老指點宮臺窪，萋萋迷悲碧荒城。
曲依舊溪流帶北斜。

送丁廷玉分教之襄陵

明薛瑄侍郎

太行之山何崔巍，鐵崖翠壁萬仞中。
天開其勢北來吾不知，其幾萬里但見橫。
亘遼磧，包括秦晉斗起中原之。
地何壯哉，往年吾嘗陟其頂。
四顧山如培塿，樹如蒼黃。
河一線遙遙下砥石，奔流直到東海不復迴。
此時英風

浩然酒六合便欲歷覽天上金銀臺其中羊腸九折走
峻坂摧輪怪石礪礪磊落而成堆太行之高且險也如
此子今遠行令人興難裁倘到昔所登覽最高處爲我
歌此一曲還徘徊西望襄陵迢迢抵幾驛驅車徑須往
渡清汾隈願子居易思險慎厥守始終永保令譽慰我
相思懷

襄陵分司題壁

司馬堊 御史

嗟予素有林泉癖每向林泉情不已昔日窮居求志時

結茆直向蘭亭裏蘭亭裏面山最深茂林修竹團蒼陰
清泉遙向半空瀉雲霧往往生衣襟我時坐卧萬山頂
心懷直與山俱靜一丸妙趣頗熟拈三代文章會深省
自從擢第向銜坡回首林泉情幾何紅塵馬前一千尺
終日碌碌相奔波幽情雅趣固無改却憶故山猿鶴在
舊學荒蕪日益深宦途宛轉真成海今朝持節出三邊
覩此清幽心豁然定應神物故相劇移却蘭亭來我前
陰森竹樹相蒙密隱約亭蘭竹深出寒泉繞屋流白雲

古木回簷礙紅日池蓮後時雖半枯風致未減知章湖
綠蒲紫荇相映帶秉燭夜看疑畫圖朗吟還向亭中坐
點點流螢拂衣過秋聲瑟瑟檻邊來木葉蕭蕭燭前墮
分明如在蘭亭中一腔澄徹萬慮空今朝曉起不忍去
怕見林梢霞彩紅

和前

顧福部郎

縈懷山水欲成癖奔走泥途猶未已東風使節駐襄陵
光景分明如夢裏石苔窄逕宛轉深交加綠竹敷棠陰

空青濕翠左右落冥濛沾我征袍襟我身疑作蓬壺頂
白雲隔斷紅塵靜清風輕向兩腋生伫立無言心自省
幽亭正倚西城坡登臨如此良辰何好鳥嚶嚶新出谷
錦鱗荇底翻晴波蒼松期我節勿改老去留得貞名在
豔紅李白能好看一夕掃地愁如海呼童洗硯臨水邊
詩成倚劔心茫然丹崖翠壁重疊見恍若屏幃當吾前
四圍花草更茂密池分一派龍泉出清兮可以濯冠纓
盤桓不厭留終日太行東望淚欲枯故山直在吾西湖

安得長風驀地起高搏遂我南翔圖拂衣瀟灑起復坐
階下流光隙駒過陰雲忽向檻外生霎時雨脚簾前墮
阻我官程雖熱中蒼生被澤非成空羣陰一讓太陽出
五雲分彩祥光紅

遊娥英泉

范晟

幽泉噴薄蛟龍吼萬斛珠璣牽荇走波心隊隊錦鱗跳
驚避釣絲千尺柳等閑探賞湏回首尙憶仙娥環佩所
嗟彼鰲降已多年泉水涓涓如說舊

蛻菴歲晏遣懷

五言律
三首

張翥

小小新齋閣温温舊髭毳精神全藉酒助力半支藤蟄
豸深坯戶冥鴻巧避矰蒙頭衲被底何異在家僧

世路正如棘吾生猶繫匏詩人歌蟋蟀軍士歎蟪蛄無
地營家食何心解客嘲山林徒在眼難覓一枝巢

書舍如僧舍心閒與靜宜寫多髡兔穎藏久艸貂皮宦
蹟年勞見生涯日歷知未應同與俊肯負沃洲期

西花園

明邢讓
邑人

別墅連城曲幽棲絕點塵雲山常在眼簪紱若爲親籬
外饒君子床頭足聖人無邊風景好來往不嫌頻

寄邢祭酒先生

吳文舉

師道尊天下才名重翰林詩書陶士術霖雨濟時心楊
柳風吹面梧桐月滿襟何年資講益重聽杏壇琴

省耕十詠

李容

燕村蔬圃

花村過雨後緩轡試閑行隔葉鶯交轉穿籬菜亂生青

梢存嫩濕紅樹欵新晴欲喚圓丁語恐爲林外驚

賈朱麥浪

漠漠平蕪地依依燕麥芄翠添新霽雨浪起晚來風天
澤元無異息波迥不同安能連萬頃頓使歲時豐

繫灑鏡天

誰滙繫灑水澗澗小鏡天遠涵晴日影倒蘸碧峯巔一
瓜潛通處齊民灌溉田分明清徹底端不是貪泉

印池曉月

可丈方池小漣漪一掬清寒光凝太液曙色薄昆明眼
底江湖闊夢中春草生黃金誰肘印曉月照斯名

福洞晴春

徑入宋村洞風光不世同鳥啼千樹碧花笑滿山紅鐘
響清蒼外人行圖畫中溪流仍泛泛疑與武陵通

市鎮曉集

風晴山市早雲合四民連紅杏墻頭出青旗柳外懸魚
鹽交易退貨利有無遷自我能平價誰人不受壓

東柴烟柳

城市南頭柳晴烟一抹輕依稀元亮隱想像亞夫營啼
鳥如遮護離人惜送迎章臺非此是莫起等閒情

西梁雲稼

晴樹藹西梁如雲萬頃黃黍垂秋色重風襲豆花香牧
笛青山外人家綠水傍扶歸田叟醉桑柘倚斜陽

鄧橋野色

登眺鄧橋上翛然野思長一痕春水綠萬點曉山蒼夾

路花饒笑連天草正芳昔賢遺愛在斯土倍生光

花塢紅香

暖風十里路宛杏色爭姝點綴千機錦粧鋪一畫圖香
酣蝴蝶夢紅滿蜜蜂鬚未許塵埃近相看隔水區

謁刑先生墓

范晟

拜謁先生墓苔封有道碑九京人去遠半夜鶴來遲雨
濕梨花慘風號宰木悲英靈如可見夕陽滿空祠

臺中卽事

劉應熊
御史

蘭署開幽徑叢筠暗曉霜碧流縈檻合翠蓋入簾香湘
浦空搖落武陵亦杳茫何如城市裏有此白雲鄉

臺中賦竹 二首

黃洪毗 御史

臘月襄陵館持杯對此君高枝斜帶雨密葉細藏雲淇
澳原同調湘江不染痕夜深風影亂雪裏動龍紋

眾芳搖落後獨愛歲寒枝勁節憐誰共虛心只自知事
傳龍化處聲憶鳳來時相對江南景烟蘿起夢思

宴襄陵公署有感 二首

周斯盛 副使

屈指曾遊日於今十五年猶餘深逕竹似減半池蓮地
有論文主人非用世賢碧筒還可折拚醉曲欄前

臺榭水中央微風過雨涼坐宜三伏暑酣任百花香曲
沼廻龍舸新蒲薦羽觴聞君歌楚調疑是泛瀟湘

過襄陵會杜定吾明府

李騰鵬

聞道襄陵好今來勝所傳中山千日酒華嶽一池蓮鼓
腹民如古鳴琴令是僊此君能愛客清影舞窻前

襄陵臺中叢竹

熊廻

叢竹當軒列天然翠作屏風清金若奏雲繞鳳疑停不
染三湘色空傳上士醒歲寒堅節操獨伴太微星

貌姑射

二首

翟師偃

共說神人宅相將一再攀龍湫幽澗底仙洞翠微間疊
嶂三千丈平泉十二灣登臨興不淺側耳聽潺湲

郭外招提隱間中載酒看涼風來近岫急水下平灘石
古千年迥林深六月寒浮生忘去住落日尙盤桓

謁龍澍華神祠

翟師偃

幽壑隱孤峯千秋廟貌崇世傳龍澍澤人誦藥王功鳥
道青天外蟬聲綠樹中登高暫作賦脉脉領薰風

題異植

並序

國朝
丁宏誨

馮翊敦菴張公宰襄陽一載公之兄登賢書邑人爲
樹幟久之標端萌生人以爲異忽值寇氛逼城公於
城樓刎頸危而復甦意樹其爲公兆坎嗣是樹枝蒼
蔚邑人愛而護之卜公後必昌大爰賦短章用紀厥

事

生意婆娑盡春風吹又回孤標同挺節偉幹自成材蔽
芾留遺愛輪囷老大才鬱葱佳氣繞疑是倚雲栽

遊龍鬪峪

謝國傑 邑令

高閣諸天近懸崖一線通雨來青嶂外身入翠微中石
怪疑蹲虎松虬若卧龍登臨今日事把酒挹仙風

龍祠和友韻

陳欲達

天源集萬壑今古遶亭湫氣噴生雲服漸鳴出雨秋泛
槎欣載酒臨渚喜鷗留倩作山陰勝歸從李杜遊

中夏遊龍祠

郭永豐

姑射之芳洲風清夏亦秋石泉疊迸出溝水遍分流魚
戲如無水龍藏疑混鯁冷然豪濮意我不異莊周

春日遊龍澗峪

喬汝爲

携友尋山徑兒童春半肩
桃花紅霧裏柳色碧溪邊
坐石嘗村酒行歌過水田
松風吹未歇策蹇入蒼烟

村居初秋雨過得爽

崔瀛

村居多古色野雨足微涼
濕鳥爭林噪欹荷待月粧
池

襄陽縣志 卷之二十四
開萍藻影風約水泉香共客懷新爽清吟對素觴

宿東山朝陽洞僧舍

二首

徐之駿

層山橫積翠歇馬遠投林寶界懸崖古禪棲探穴深晚
風消夙暑初月下輕陰坐聽疎鐘發塵囂何處侵

未愜投山意聊觀卓錫綠野花香有色澗水淨無烟聽
鳥高松外尋碑積蘚邊老僧堪一話此會更何年

送襄陵令李君

七言律

宋 歐陽修 學士

綠髮襄陵新長官面顏雖老渥如丹折腰聊爲五斗屈

把酒猶能一笑歡紅棗林繁欣歲熟紫檀香軟禦春寒
民淳政簡居多樂無苦思歸欲掛冠

奉寄張蛻菴承旨

元
釋來復

東觀蓬萊紫翠間五雲飛繞佩珊珊宮中夜賜金蓮炬
天上晨趨玉笋班老去乞身思故里間來隨意宿禪關
茗花溪水春如酒何日誅茅傍碧灣

按察分司壁題

明
蕭 啟
都御
史

地位森嚴竹木幽亭池四面引清流晝長風動荷香細

夜靜波搖月影浮
闌檻生涼消客慮
軒窓穿綠逼人眸
巡行何必分南北
此處原來勝舊遊

和前

趙

欽按察使

可愛霜臺景物奇
喬林茂樹綠參差
森森翠竹遮荒徑
隱隱寒泉入小池
風動荷香魚出躍
月明露冷鶴歸遲
倚闌獨立心如水
清意無邊祇自知

和前

顧福

景出汾江第一奇
小停西倚堞參差
雲出澗壑山懸幕

水遶簾櫳地湧池碧藻靜涵春雨潤畫闌斜照夕陽遲
歌臺舞榭成泥土此段清風摠不知

和前

黃著 御史

形勝河東此最奇蓬壺仙島若堪差春風花氣薰苔徑
夜雨泉聲漱石池碧樹團陰侵几潤白雲拖影上闌遲
天機幻出無邊趣賸有幽懷野鶴知

和前

李咨

誰製西園一段奇尋常景物少堪差蒼松偃月龍蟠窟

翠竹臨流鳳浴池地面南偏春意早墻頭高礙雨聲遲
公餘幾度頻來往見此清修若故知

題清風亭

趙 歌

芰荷池畔跨橋亭花木交加簇畫屏鶴避茶烟棲古樹
魚吞硯墨動浮萍水連天去無邊白竹遶堤來不斷青
公便駐驄須飽玩重遊焉肯厭勞形

和前

顧 福

十丈塵中見此亭古苔怪石倚雲屏春風生意滿階艸

世路功名一葉萍
秋水遶池浮鴨綠
遠山逼漢擁螺青
幽然自得乾坤趣
豈是尋常月露形

和前

黃著

綵雲堆裏聳孤亭
當面湖山擁畫屏
落葉鳥驚風偃樹
晴波魚躍浪翻萍
雨添香艸沿階碧
烟鎖修篁夾岸青
暫却紅塵於此憇
支頤相對竟忘形

宣聖廟釋奠

李谷

五夜庭燎薄上蒼
黌宮諸子藹跼跼
禮遵彝典犧牲備

襄陽縣志 卷之二十四 表
神假丹誠俎豆光芹藻尚霑洙泗澤詩書猶帶杏壇香
斯文自是應珍重萬古綱常賴素王

同前

范 晟

盛世尊崇祀素王泮池日暖藻芹香禮行三獻尊周典
樂奏咸和應魯堂濟濟衣冠聯玉佩輝輝燈火雜烟光
中天奎壁星華燦瑞協文明萬載昌

晉橋梅月

李 咨

漫傳梅月間時竒三載依稀入夢思圓處每憑冰鑑影

開時常藉雪霜姿謫仙把酒應曾問和靖當年亦未知
惆悵雙清今寂寂一竿青旆畫橋西

同前

索 睿 教諭

幾迴閑賞晉橋邊梅月相傳不計年每愛冰霜添綽約
尤宜午夜對嬋娟調羹有待何時實折桂曾看幾度圓
更喜飛塵無半點清癯風味出天然

同前

范 晟

梅在橋頭月在天一枝低亞映嬋娟梅期月兔知開謝

月約梅花伴缺圓何處暗香消息透誰家殘照景光偏
於今冷落雙清趣不見逋仙與謫仙

三嶝雲峯

李谷

嶝嶝山頭更是山嵯峨直入碧霄間華池北去連平水
姑射南來接故閔翠嶂着烟濃又淡白雲拖影去仍還
幾迴晝靜鳴琴後閑擬西山作畫看

卧龍靈應

范晟

崇山西嶠卧龍祠肇自隋唐全盛時岩石棲靈常電達

珠林聽講有僧知
雲生潭影藏蛟窟
風遞鐘聲吼葛陂
歲旱爲霖興變化
堯封今日賴雍熙

湖山烟雨

索 睿

山色湖光靜鏡開
行臺佳致勝蓬萊
數峯削玉天邊見
一水通池地底來
柳蘸綠波魚散去
烟迷青嶂鳥飛廻
公餘時向高亭飲
賸有荷香到酒杯

汾流晚渡

李 咨

東郭東頭汾水濱
波流縈處是通津
櫓聲欸乃驚紅蓼

夏國集卷之三
漁火熒煌照白蘋待渡馬嘶楊柳岸扶歸人醉梨花春
堪憐畫艇步兒大能濟東西南北人

同前

索 脣

襄陵城郭枕汾流落日行人喧渡頭踈柳遙連關外市
澄波倒浸岸邊樓櫓聲嘔軋斜陽晚漁笛淒清遠浦秋
南去北來無限客濟川獨賴一扁舟

同前

范 晟

長流滾滾鴨頭新路隔東西攬要津紅蓼綴灘霞散錦

白蘋觸岸浪翻銀夕陽林杪催行急水鳥沙頭喚渡頻
閑聽棹歌聲欸乃滄浪一曲濯纓塵

巢溪春漲

李 咨

殘雪初消北岸晴巢溪曉漲擬橋平驅牛事已湮陳蹟
洗耳人猶擅舊名草色遙連春漾漾柳條低拂綠盈盈
誰知一綫清風遠千載桐江釣子陵

同前

索 膺

泛泛春溪漾碧漪當年巢父此棲遲荒祠遺像今猶在

夏陽縣志 卷之二十四
清節高風世共推柳帶和風青裊裊岸痕新漲綠差差
我來欲把塵纓濯却恐仙靈亦見疑

同前

范晟

洗耳曾聞耻飲牛問人消息屬巢由三交雲液豸花淺
百尺烟光柳帶柔高樹鳥啼猶識姓古祠鹿過亦回頭
春風北岸添新漲一脈清清依舊流

飛虹雨霽

李咨

迤邐長橋擬螭螭往來人在画圖中夕陽半落橫清澗

宿雨初收揜碧空
題柱固難司馬氏
乘輿已陋鄭人功
何須驅石到東海
天下車書正會同

同前

索 睿

長橋跨澗勢穹窿
雨霽雲衢卧彩虹
華表遙看殘照裏
雕闌斜倚半天中
雄臨晉地山河險
密邇秦關客旅通
役役紅塵經過者
誰能不仰濟川功

同前

范 晟

公輸巧構枕高寒
雨過虹飛壓澗干
鳥向日邊翻霽色

人從空裏倚晴闌
銀河漫說津曾問
烏鵲空傳羽未乾
獨有昇仙題柱客
歸來車馬自長安

龜山晴雪

李咨

雪霽東山渾似畫
幾迴徙倚闌看
犬牙排玉三峯冷
龜甲凝銀數點寒
瑞氣鬱蔥塵世杳
晴光燦爛海天寬
小樓添得無邊趣
多少瓊瑤落筆端

同前

范晟

岩堯一帶擬龜形
雪甲嶙峋拔地靈
巉岫幾層排玉戟

斷崖十里聳銀屏
林間野鶴閑清夢
礪下寒梅散遠馨
紅日曉從天外出
分開數點雪中青

雲亭環翠

索 膺

侵曉池頭宿雨收
翠雲晴護小亭幽
交加淇水千竿玉
彷彿瀟湘一片秋
座上好風來面面
吟邊清興自悠悠
宦遊獨有霜臺客
佳句琅然任唱酬

平水拖藍

李 咨

溪上巉崑列画屏
溪間流水玉崢嶸
堯封溝澮猶天造

禹蹟山川仰地平豐稼擬雲秋色重疎林過雨晚涼輕
何如萬派皆澄徹唯有源頭一脈清

同前

索 膚

源泉混混出雲根絡石穿林絕點塵十里翠鋪湘簟靜
一灣綠染綺羅新荒烟野渡隋堤景芳艸汀洲洛浦春
苑屋幾家臨水住朴淳猶是古堯民

退菴別業

邢 讓

卜築西垣最可人青山爲屋水爲鄰身將隱矣文何用

人不知之味更真自古交游少同志到頭聲利不關身
清泉便可如澠酒澆盡胸中累劫塵

省耕宿釋迦寺

李 谷

青崖絕處古招提棟宇猶傳至正時
仆草斷碑苔蝕字
摩空老樹鶴巢枝蒲團寂寂僧歸定
竹院蕭蕭月上遲
一夜虛堂清不寐蒲懷民瘼有誰知

九日姑射山登高

李 谷

三年山右逢重九每度佳辰興未休
綠醕似憐遊宦客

黃花猶戀少年頭
風流自許追元亮
知遇誰能繼馬周
登眺有懷歸路晚
蒲林紅葉不勝秋

承恩寺集古

邢訓 邑人

門外春橋漾碧波
馬伯膺萬家烟火夕陽多
趙子昂青

山盡是朱旂繞
王摩詰寶地曾經翠輦過
陸天錫上國

幾年倍賜履
張仲舉海門何處問魚簑
王熙論心得住

慈雲閣
趙學士願及昌時養太和
范德机

清音亭

雷復

棣萼相輝覽勝遊
停驂偏愛水亭幽
林花紅落三春雨
池藻涼生六月秋
遠岫淡烟浮罨畫
斷橋流水雜歌謳
太平樂事真難遇
試問瀛洲有此不

遊姑射山

黃克纘

平泉西下白雲天
流盡韶華不計年
餘瀝已膏唐地外
愁聲故落晉宮前
濯纓清對人如玉
綉佩香傳澗有荃
更想歌風汾水曲
中流直欲泛樓船

姑射龍神祠

黃洪毗

仙人姑射御神龍噴出寒泉晝夜同殊勝中濡誇絕品
平分二邑誦元功雷聲遠聽渾疑雨雲氣長噓不待風
古廟斷碑深樹裏莫將伏臘負村翁

趙曲懷古

李元齡

搔首浮雲晉地深名山一望負登臨秋風似帶韓王氣
白日疑懸趙朔心墟里人烟汾水渺樓頭星象太行陰
我來懷古情無極澹澹斜暉起暮砧

望曉樓成秋日登臨

陳

勗

邑令

重上層樓御遠風雲連齊晉度飛鴻喜瞻灑氣文星爛
慶洽蒼穹湛露豐東臨汾浦疑銀漢西列姑射幃碧空
興來把酒歌明月遙接清光萬里同

登鎮汾樓

翟師偃

直上高樓思渺茫擬憑黃鵠任翱翔眼空禹服三千闕
笑指秦關百二長劃地風雷壯冀北彌天日月照河陽
當年虞夏涸風在翹首令人憶帝鄉

暮春登東山

翟師有

星巒矗兀俯千畦春服遊人逐馬蹏嬾嬾金爐香霧礮
芄芄紫陌柳烟迷苾蒻老衲禪無障肥碩高標仙有梯
我亦欲來尋侶伴山靈肯許下招攜

視蹉重遊賦懷

國朝

胡秉忠

擒昌筮仕幾更秋今日巡臨亦舊遊騎竹兒童連紫陌
攀轅父老盡頽頭花封愧比古遺愛柱史依然昔後侯
暫浣征塵剛信宿吟懷聊寄署中留

異植

序見五言律

郭永豐

高標特立莞生枝掩映孤忠戕復孽錯節蟠根形岌業
吸精飲漑勢參差千春紀歲應同這八桂成林未足奇
最是當年深惠愛依依垂蔭繫人思

同題

吳世爵

陰陰樹影滿河陽悴後榮生更自芳續命瓊田聞異草
返魂姑射見靈香惠風秀發萊公栢麗日光浮召伯棠
已卜留傳千載下蒼髯擁戴應同長

同題

趙昌運

獨立昂然倚碧霄不因多難遽殘凋心堅北闕喬松質
血濺南樓湘竹標盈野春風琴謾謾凌空皎影鶴翛翛
論功誰是持平者大樹無言名自昭

同題

喬運閔

旌標底事忽生繁貞幹由來世所存百里安絃猶徧野
十年嘉樹已蟠根綽兮陶柳清風肅渥矣劬膏惠日溫
節義於今終不泯兒童歌舞自晨昏

同題

趙鴻運

惠聲自昔推分陝不謂甘棠此樹同已向憇時早見德
却從剝後更標忠清光密覆平泉上瑞色長留姑射中
爲祝軾熊臨賁日瞻依道左拜仁風

咏異植和趙叔漸韻

崔瀛

曾聞古槭色龍葱榮發旌干翠蓋同原向蟾宮分異種
堪依楓陛表孤忠遍飛雨露千家裏上接雲霞一望中
還憶當年誰栽植只今葉葉舞春風

凌雲塔告成

謝國傑

浮圖巖岬枕河流佳氣蒼茫射斗牛影入波濤龍欲舞
勢分霄漢鳳來遊窻虛日麗千山碧簷角風清六月秋
願得朱題同雁塔樵川姓氏共悠悠

前題

吳世爵

層圖矗起飲汾流橫鎖如杠上下浮四面山光環翠壁
一灣水灩隱青蟻憑高上薄天樞近擷秀深涵地脈悠
從此文章傳相筆千年淑氣載神州

前題

喬運閔

亭亭層構倚雲端四野烟光眼底看儼若天闕撐玉柱
疑同仙掌擎金盤晴嵐拱揖霞爲幃平水滌洄錦作闌
此日身登千尺上紫微近傍聽鳴鸞

前題

張元聲

巍建削成歲月勤屹然一柱應星文盤回面面通佳氣
矧矧層層拂靄雲蒲縣莢花烟裏見夾堤楊柳水中分
運斤獨藉神君力卓矣清風未可倫

前題

趙鴻運

凌空寶構勢嵯峨壁立汾干瑞氣多萬壑烟雲象外出
千層濤浪眼中過團團華蓋承仙露匝匝簷鈴雜佩珂
自此近天特尺五非閑靈鷲禮維摩

前題

喬運闥

塔影臨流揮碧空經營幾度策花驄仰瞻奎宿窻窻近
俯聽濤聲戶戶通地氣龍旋標玉樹人文鵲起列珠宮
高頭多少題名字誰不咏歌茂宰功

前題

席嘉賓

塏勢巍我汾水東登臨身在碧虛中雲間鶴影翩躚下
望裏蟾宮咫尺通揮筆文章連斗象舒懷衣袖滿天風
當年王粲豪吟處可似層層倚太空

前題

王升秀

扶翠遙遙接碧空矗然亭峙鬱葱龍山光盡日明朱檻
水勢因風動寶鈴飛鳥翺翔時上下落霞明滅乍青紅
洞開八面文星燦欲步雲衢此卽通

雨罷晚渡汾河

崔瀛

雨過殘虹射怒波船頭猶掛雨時簑行人喚渡舵聲急
飛鳥依城暮色多烟樹紛迷籠碧草雲山遙望點青螺
長風波浪都閑事且卧中流發棹歌

按察廨中銀杏

郭永豐

疇昔誰敷惠澤深頓令勿剪到於今都將珍品埒文杏
羸得芳名喚白金挺翠獨當花滿縣生幽全軼桂成林
無由可把清貧療摘爾盈筐慰我心

題晉橋通閣

郭永豐

扶梁復覩舊薨牙
想象梅花共月斜
一帶雲山簇屋舍
數行烟柳茂桑麻
農人雨驟無煩笠
役客日曛好駐車
不似六橋歌舞地
相將詩酒競繁華

晉橋通閣成

趙鴻運

曠載經營此日成
霓虹一縷入山城
人遵帝道行來爽
水自仙源流出清
岸柳將踈樓市接
郭田欲斷塢烟生
濟川有志丹楹在
常與梅花伴月明

晉橋梅月

徐之駿

畫橋雄峙接岩城屏霍門前古道橫
牧笛遠過芳草滑 酒帘斜颺綠波明
千秋梅月仙留影 三晉雲山客計程
溪水東流無限好 長安北望不勝情

三磴雲峰

萬樹宜興人

西南尤美是林巒 謝屐初過得大觀
漸入雲霞人不見 已無冰雪晝長寒
方從狼尾三盤上 更列龍腰九曲看
此地由來有真宅 青泥應可當晨餐

卧龍靈應

侯文燦無錫人

探竒歷歷徧羌封喜到崇山最上峰古廟宿雲千仞栢
晴郊飛雨六朝龍結茅豈有隆中隱叩石時來圮下踪
野鳥似將靈勝處啾啾詳說與遊筇

汾流晚渡

侯文耀

無錫人

靜渠山足古汾源流向秦皇駐蹕村
迤照樓臺花映水
落霞城郭柳侵門
蛩竦橋影經春卧
舴艋篙聲入夏喧
山簡正來携酒處
小鮮剛喜上漁綸

巢溪春漲

徐之駿

石隱祠宜矮屋檐檐前流水正漸漸猶憶兩耳紅塵在
更遣三春碧浪添北岸蘼蕪淹軟翠東風楊柳蘸香尖
無心却愛村童牧清濁相忘飲不嫌

飛虹雨霽

萬樹

莓苔拂讀古碑豐爲記輿梁利涉功遠礪爭流鳴宿雨
深林高靄跨晴虹樓懸星斗雙崖峻路人燕秦萬里通
呼應提携人不絕夕陽芳草畫圖中

龜山晴雪

侯文燦

石紋如織草茵香雪後還宜早旭光古樹綴花成庾嶺
亂烟浮石作崑岡棋枰錯落諸村映衣帶廻環一水長
試倚危闌看曉色白龜疑出預且囊

平水拖藍

徐之駿

藐姑神境曳平坡仙液鍾靈孕碧波龍卵一祠探穴古
蜂房諸洞濬流多從汾入海三千里分邑滋田十二河
蓼嶼鳧汀堪載酒嘈嘈鳴瀑和清歌

龍澗雙闕

萬樹

蜿蜒深入傍山椒忽見仙居出絳霄
陡嶂劈分成貝闕危崖飛接亘銀橋
空中樓閣清陰迥物外烟霞俗慮消
紅袖青衫相映好陀郎祠下馬嘶驕

十里荷香

侯文耀

南陌香塵一徑斜薰風楊柳壓堤沙
越羅平繞千畦水蜀錦橫鋪十里花
遊女踏歌分皓月歸人鳴騎出丹霞
幾將湖上屯田曲吟向沿村賣酒家

莫春遊龍池卽席分韻得泉字

萬樹

平山石齒吐平泉龍子祠前碧可憐
一勺遠浮十里浪
雙流分潤兩河田聲隨琴調經堂下
清入茶香到枕邊
夾岸落紅迎客騎此中真有貌姑仙

分韻得流字

徐之駿

古署槐根枕碧流時將清籟入層樓
西來壺口重巖孕
東下汾河萬里浮謾說登臨宜杖屨
喜分膏澤爲田疇
籃輿過處聞鳴珮疑是春風帝女遊

分韻得溪字

侯文燦

泉聲百折向城西直下堯民洗耳溪古洞尋源叩蛟蜃
危橋飛瀑散鳧鷖一川蒲芷香浮石四野桑麻翠遶畦
白墮緩傾歸欲暮喜從花下聽銅鞮

飲鎮汾閣

萬樹

城俯汾河帶水長城邊高閣倚河梁西來爽氣迎姑射
東去晴霞捲太行出浦浮魚花正落隔畦飛雉麥初黃
使君饒有登臨興爲愛農歌起夕陽

和陽羨萬紅友韻

徐之駿

層樓望曉日舒長南浦雲生入畫梁花柳山川相掩映
桑麻村郭更聯行褰帷問俗風猶素載酒登高月又黃
聽唱江南竹枝曲頓令歸思到東陽

和前

侯文燦

吏隱能兼雅興長鄒枚賓從媿遊梁日斜麥隴烏犍隊
雨歇蘆洲白鷺行民俗懽乘春色麗客程愁見晚塵黃
仲宣更自懷京國望眼隨風過岳陽

和前

趙良玉
教諭

凌虛攬勝意何長
宴比橫汾句栢梁
官况但須看逝水
民風還試望周行
亭臺幾處垂楊碧
烟火千家落日黃
不上斯樓一憑眺
那知春色在河陽

和前

鄭王牧

訓導

三載堯封惠澤長
公餘登陟望津梁
濤聲近接知龍沫
嵐勢廻翔似鴈行
樹繞劉淵城下綠
雲歸許褚堡前黃
政成薰阜宜行樂
豈但風流說孟陽

重建屏霍樓

喬運闡

危閣凌空俯眎壕，凭欄遙仰北辰高。
姑山夕照霞堪畫，汾水掉歌聲作濤。
眺望雅談三古事，登臨雄弔二陵豪。
偉功此日誰成者，太史彤廷奏鳳毛。

村居

五言絕句

張著

危橋入孤村，老木倚絕壁。
幽鳥啼一聲，萬象動寒碧。

山禽

邢讓

芳樹豈不愛，懷彼金丸懼。
何如此幽林，閒來又閒去。

雜咏書分司壁

二首

沈鍾

我別池亭去重來閱二年頭顱真老矣風景只依然
茲軒偶登臨湖山憑一覽達人更大觀乾坤落雙眼

過襄陵懷徐令萬之

張四教

我過襄陵道感君去後思貌姑蒼蘚處誰復爲題詩

過三交水吟泉邊鳥

張鉞

泉琴發幽響立鳥如解音遊屐亂其聽飛逐野雲深

過山居

六言

李容

一聲兩聲雞犬十里五里人烟矮屋低垂綠樹斷墻斜

補青山

襄陵城北溪坐

七言絕句

宋張宇

楊柳陰陰水氣涼
椒花蔌蔌野風香
地偏愈覺似閑整
始信擒昌化日長

龍澗峪天橋

元趙孟頫

天門高處兩仙橋
縹緲白雲手可招
坐飲漸醺毛骨爽
翩翩鶴下羽翛翛

清音亭

張昌

四面嵐霏簇綺筵
雙渠流水響涓涓
清音亭上春無際
且放滄浪入管絃

過晉橋

張 鶴
御史

記得當年賣酒家
壁間明月照梅花
於今泯滅無消息
獨有長橋對落霞

丹朱泉

張 礪

太阿拔處卽隨流
一脈源源不斷頭
孰謂丹朱非聖子

至今遺惠在田疇

坐清風亭口號

魏東山

都御史

密竹春深掩碧流
風光渾似楚湘秋
獨憐過此亭中客
不是偷閒汗漫遊

題大尖山

李

濬 太平令

雨過東山翠欲流
平陽雄鎮幾千秋
羣山遠近知多少
仰止誰能出一頭

和前

李 咨

一帶名山下
枕流懸崖峭壁倚
清秋東南遠眺高無際

唯有青天在上頭

襄陵行春

李咨

只恐殘紅落亂紛
長吟驚破睡鶯魂
春光何處堪舒目
花柳汾川岸上村

龜山謁留侯墓

孫仁

隱隱龜山最上頭
佳城云是漢留侯
當時輔佐興王業
帷幄從容任運籌

伯道古居

李輅

零落村墟伯道居高名千載晉尚書依稀遺愛橋邊柳
却訝當時繫子初

天真觀銀杏

邢訓

實白如銀滿樹香亭亭植向老君堂仙家只說蟠桃好
難及珍名占果王

春日遊巢溪

范晟

巢溪春暖等閒過鯉鯉晴翻洗耳波漫想驅牛人去遠
岸頭荒草野花多

題襄陵分司 三首

韓邦奇 尙書

汾水春深落晚霞沿堤十里盡莨花
回船簫鼓遊人醉漫說風流是杜家

薰風綠沼碧荷香玳筵歌兒舞袖長
一醉襄陵傾百盞不知風景是平陽

姑射泉邊萬竹稠清風樓外四山秋
重陽醉後歸來晚黃菊紛紛插滿頭

題留耕亭卷 二首

邢讓

方寸良田遺後人仁耕義耨可終身不須歲歲占風雨
管取豐登過四鄰

白玉黃金謾作堆他年徒爲子孫危遺安有道春常在
惟有襄陽老父知

謁巢由祠

何思都御史

千年洗耳今還在草木淒涼萬古悲指點清風何處是
鷄鳴山下對殘暉

謁龍祠

王諍御史

姑射山下亭子幽百泉滾滾掄澄秋不須急向河汾去
聞說前頭是濁流

登鎮汾閣

曾舜漁 御史

巍巍傑閣倚晴空壁立汾干地勢雄登臨若對南樓月
千頃汪洋碧落中

別峩咏

國朝 喬堯仁 峩眉令

皇恩特許返家鄉拜別三峩檢舊裝莫訝寒官無一物

山山水水滿奚囊

過晉橋訪梅月酒樓

崔瀛

仙客當年貰酒家月明疑照舊梅花
橋邊問有誰重醉只見青帘影半斜

題晉橋

喬運閔

接城幾武石橋拖一道長虹跨碧波
樓市疑從海上見輪蹄宛在画中過

題凌雲塔

陳欲達

彩筆文涵紫氣浮幾層高擬過雲流
亭亭玉立詩中画

不羨元龍百尺樓

續增詩

藐姑射山

五言古
六首

毛 達

司李

日出霍峰頭彩雲蟠其下光暉映城隅藐姑相照射恍
惚見仙人玉顏殊瀟灑醉倚白鹿肩縱橫同騎馬

十載訪丹邱夢魂殊勞瘁不意藐姑山相呼入坐墜仙
人逐日來微言授天吏無妨筆如刀但寫活人字

姑山臨汾河綿疊數百里其間冰雪姿居處無定止倏

見山之陽相招隔秋水心容永潔清願言余與爾

襄陵有平泉出自姑射麓幽房結其巔疑卽雲霞屋美
人從中來芬芳散林木呼我臨清流携手照心曲

姑射產群芳琪花及瑤草仙家棄如蒿何必費尋討世
人事服食安保顏色好笑示不死方教余却醜老

或言汾西縣舊有藐姑里土人邈難求至今遺銅屐著
之如輕綿可以涉雲水延伫待雙鳧朝暮常徒倚

遊龍子祠步毛刑尊韻

三首

喬瑞圖

沿溪入勝地彷彿堯源里處處足怡情随心任行止誰
比詩人骨惟此清溪水把酒獨謳吟聊復應爾爾

乘興便登山莫問我僕瘁搜盡幽險跡臨流且長睡詩
愧青蓮人情同彭澤吏欲覓藐姑仙示我蝌蚪字

何時遠塵囂結廬山之麓潺潺水繞座片片雲覆屋乳
燕掠新泥黃鶯鳴古木洗盡秣糠腸好譜流水曲

同前

張 郊

鬱哉藐姑山平泉出其下泉流亂縱橫珠沫相噴瀉入

耳聲淙淙此境殊
瀟洒曠然怡我神
貪看時駐馬
比郭有奧區
距城十餘里
蜿蜒當翠微
仙人舊栖止
百道入汾襄
相傳是德水
倘無灌溉功
清泚徒爲耳

龍子昔有祠
卜築山之麓
巋然古靈光
支撐破板屋
曲沼潛脩鱗
棲鴉噪神木
流水高山間
聊以寄心曲

美人懷西方
淫哇嗤北里
倘遇安期生
形骸若敝屣
空谷來足音
心清卽止水
日暮憺忘歸
臨風重徙倚

趙邑侯剔除倉積弊賦歌

張卯

盛代仁民規奉行恒爲市吁嗟預備倉一年一換易官
不暇親臨大爲侵漁利出入歛散間青苗害不啻粒瀆
顆顆員色不許有二旣驗入風車一半還拋棄然後斗
斛量淋漓故滿地收注無定期交者爭委贄嗟彼遠鄉
民負戴竭蹶至留難宿客房所納不抵費米代旣無由
銀折難明致宛轉與吏謀且喜得指示瓜分肥私囊所
求務愜意火耨與水耕辛苦意誰爲惟我趙父母不將
耳目寄盤查懸冰壺何處容魑魅近者旣不憂遠者亦

無滯從此升斗餘皆拜神君賜

地震述

丙子暮春
七言古

李宏柱

平陽地震臨襄洪浮四邑較重臨襄又甚城郭房舍存
無二三居人死傷十有七八更可慘者斯時之烈火燒
天黑水湧地厥後之夏田騰烟秋陌浮蛙傷殘餘生何
克堪此辛總鎮毛公來鳳郡守王公輔同心合德保衛
民生而億兆再蘇皆二公之賜也聊撰此歌

乙亥四月之六日銀蟾西轉夜入戍長天無翳野無風

萬戶光涵萬籟寂颯然有聲來向乾星月無光玉宇黑
豈知地裂與山崩但覺怒濤迅雷逼衝沙石竄若飛
僵卧街心魂已失醒來却把我弟手兩兩驚詢語共澁
相持相扶覓萱親高低舊路杳難覓倚天臺榭忽倒眠
當路却見青山立行行相呼不相聞吞聲帶咽緣竇入
母幸無恙家人全負母携兒循竇出脚下如沸復如鼓
時去時來不肯息母子相逢死亦歡席地團團相抱泣
叢叢燎火若亂烽乍暗還明光灿灿斷脛折臂已非人

帶血披髮真鬼域綿綿昏夜不知曉恰如是月無初七
東方漸高日色紅繪出愁城與愁國房舍人民僅半存
傷殘橫倒殊堪惻旋聞滿縣盡罹災又說洪浮臨三邑
車走雷轟無了休城狐社鼠還相賊太守能仁總戎賢
飛章告請如羽急天子披讀淚交流溫語重重垂軫
恤百萬金粟遍死生成若夏苗時雨浥億兆終戴聖人
恩至今猶頌太守德

卧龍山覽勝

喬瑞圖

太行之竒亦何極遊人對之常嘆息分巔更有卧龍山
疊嶂翠浮千重色我乘孤蹇探名踪山路曲曲白雲封
瞬息峰迴路亦轉千丈絕壁掛長松攀松踏遍山之徑
屐齒雲霞足逸興冷然石室寒風吹滿耳天籟時相應
尋幽還陟卧龍祠貝闕珠宮山外峙河東阡陌賴其靈
萬古千秋常爾爾爲問卧龍卧幾年何時燒尾上碧天
須臾霹靂空中起片雲倏爾彌大千覽盡名踪聊徙倚
欲發狂歌又復止惟恐泓下有龍吟驚斷高山共流水

襄陵署中堂之西隅有古栢一株名曰異植因成一

律五言

趙懋本邑令

誰人植斯栢歷送去來官勁節同春茂堅心耐歲寒樹
高塵自遠幹老蔭恒寬好具叅天眼青青着意看

咏異植

孤幹凜標日誰人識異姿堅貞原不昧生發自然施西
域香猶幻秦封事涉私庭前寧獨立霜雪耐多時

汾河晚渡

兩岍人喧渡輕帆去復旋
水平春漲雨柳拂暮雲天
伊軋波心穩微茫漁火連
試看行役者多爲利名牽

過鄧中丞故里

賸有孤村在高風自不泯
棄兒存古道遺妾見天真
麥飯今誰供思君一愴神
嗟嗟爭繼者何事輒生嗔

龍子祠

仙姬乘鹿去龍子鎮平泉
阡陌承波遠臨襄受澤先
旱澇無足慮禋祀秉心虔
靈爽昭民物長歌大有年

夏旱

旱魃何肆虐憂心若轉輪不堪淚作雨愁見地生塵有
罪宜誅我無私莫病民悚惶虔致禱望澤勝如珍

喜雨

好雨從何至權聲風送來枯苗今日潤愁眼一時開洗
出郊原綠滌除旱魃災望霓心已慰含鼓樂春臺

和趙明府喜雨韻

盧秉純

塵笑元規去霖疑傳說來土膏從此潤天眼爲誰開二

夏陽縣志 卷之二十四
語神如聽三農夏不災宰官身可現汾上雨花臺

和趙明府憂旱原韻

張 邠

連宵觀畢宿竟不離冰輪多少田間淚難清地上塵歛
歐勞 令尹鳩鵠看黎民從此豐年穀人人應惜珍

和前

盧敬丹

欲效桑林禱何人催雨輪無行不引鑑有步早清塵共
信爲霖手頻援顛地民天心如感格點滴亦皆珍

同前

喬瑞圖

四野成焦土三農苦火輪祈垂銀漢水早潤陌頭塵造
福賴明牧回天起瘠民滂沱應有慶不使雨如珍

同前

柴惟馨

勤勞爨理手欲轉阿香輪願望一天雨滌除四野塵方
知官似父實念子爲民但鑒誠求意堯封慶力珍

同前

柴友逋

神君虔步禱膏澤不濡輪愁見野無雨堪嗟釜有塵如
焚憂漢吏靡子念周民願挽銀河水傾盆滿地珍

同前

張恂

甘霖何日降百計似迴輪步乞金龍澤欲清姑射塵陳
詞籲上帝裂趾痛吾民料應回天意蕭蕭注碎珍

和趙明府喜雨韻

柴惟馨

誠格天心轉知時好雨來枯苗千畝綠愁眼萬家開賴
此桑林禱免歌雲漢災盈室今有慶頌祝繞琴臺

擬登望曉樓聽鶯

李宏柱

何處鶯聲好春歸望曉樓海霞紅靄靄堤柳碧悠悠並

坐情堪妬交鳴韻莫傳願言同勝侶斗酒日追遊

趙明府重葺學宮

盧敬丹

文運宏開日克肩人所難六經天不夜一鏡水澄寒
瀆沼看魚躍摩雲驚鳳搏神龕無卧磔多士壯殊觀

遊高忠節公墓

喬瑞圖

浩氣橫丹闕忠魂散碧天聞風常仰止式墓獨留連
斷石藏狐兔荒松啼杜鵑綠溪流不盡血淚尙依然

龍澗雙闕

柴友逋

曲折藏深秀高低入畫圖虹橋臨壑迥虬樹拂雲孤寺
古松全老碑殘字半無憑誰問往事把酒自踟躕

登山嶺寺

五言排律

張默

山嶺名勝寺高迥薄雲巔徑絕人蹤罕苔肥獸印鮮峰
平姑射藐嶺復太行連謾謾風濤冷稜稜塢影圓蟲絲
罥殿角蔓草沒堦筵飛閣疑無地丹崖別有天虬形蒼
檜古鶴髮老僧顛登陟諸緣盡逃虛愛學禪

聖壽寺龍爪槐

七言律

澹圃徐亮

山陰人

古樹何名說是槐虬枝盤曲覆蒼苔可能奮臂拏風雨
且欲擎拳鬪竹梅華蓋當庭真色相袈裟拂眼認靈臺
卧龍未耀先舒爪伫聽春風動地雷

庚辰暮春同朱子範二尹高幹臣廣文春郊勸農

惲東生

邑令

政拙山城念省耕敢辭櫛沐戴星行沾塗自是田家苦
供億何煩小吏迎但使三時無曠業從教半綰有餘榮
豚蹄斗酒非賒願願慰窮簷望歲情

和

高尚志 廣文

清齋苜蓿代躬耕得伴仙鳧取次行待哺兒童籬外望
荷鋤野老馬前迎蕙風吹處鶯花繞好雨足時草木榮
謾道使君饒逸興閭閻疾苦本關情

媧皇泉三次步禱甘霖輒降皆帶雨而歸敬占一律

以誌 神麻

趙懋本

爲民步禱出城東齋潔身心謁上宮屢籲惟求誅旱魃
頻邀垂鑒遣靈霞雲從石起曾經煉雨向泉生自不窮

感德那知歸路滑但聞野老說年豐

壬子入夏苦旱予於閏月二十三日步禱之後因公
赴郡歸至中途遇雨如注誠大快事也口占一律

誌喜

今日因公赴郡城歸來載得雨如傾陰雲匝野溪聲急
汾渡舟橫沙岸平愁病頓除沂有歲士民相慶地堪耕
輿中不覺衣巾濕喜聽班鳩逐婦鳴

閏月廿三得雨之後廿五夜又雨民方憂旱連得甘

霖靜聽之下喜而不寐因作聽雨一律坐以待旦
前日輿中聽雨聲今宵夢裏更分明瀟瀟響溢簷流急
滴滴音隨夜柝清入耳便生涼滿席成渠遮莫澹皆盈
披襟坐待晨鐘後先向郊原課耨耕

平泉亭讌飲

峕暮春三月
二首

失名

平泉百尺出山窩直繞清音亭上過席地綠茵凝宿雨
參天奇樹映清波笙歌咽處間雲靜盃斝浮來逸興多

追憶蘭亭脩禊事臨流幾欲醉婆娑

清音亭上且凭欄萬壑千巖一縱觀幾曲溪流聲瀝瀝
一泓碧浪響漫漫平泉直向山根出奇樹疑從月窟看
况是春濃花艷日飛觴莫吝酒盃寬

地震後歸里入邑城有感

翟維藩

遼鶴歸來一境空滄桑變易話東風廬依瓦礫人烟少
路夾蓬蒿野徑通燕雀何從尋舊壘雞犬無處認新豐
不堪聚首憶前跡如錦襄城似夢中

詠鎮汾樓呈惲明府

張大聲

百尺高樓嘆壯觀，凭高四望海天寬。
蛟龍隱約浮欄出，星月光茫倚檻看。
萬樹柳烟籠画壁，千頃荷葢映雕闌。
物閒心靜渾無事，好整琴絃閣上彈。

和趙明府聽雨韻

盧秉純

夜窻聞打綠蕉聲，笑拂衣香坐到明。
簷上溜來琴可譜，庭前唳處鶴偏清。
稼蓂雲影芄芄滿，簞想波紋細細盈。
曉起更煩靈雨駕，柳陰泊裏勸深耕。

同前

雨濕譙樓咽鼓聲琴堂人聽最分明詩中雲漢愁如洗
夢裏華胥境亦清柳帶定拖朱檻遠荷珠擬跳錦塘盈
自憐廿載甘龍卧未有南陽地可耕

晉橋梅月

大抵仙人半酒徒醉中閑採藥葫蘆傾來月影花千朶
幻出天香水一區奕世尙酣風味好片言莫笑土人愚
墨猪只合耽糟粕縱有金丹飽得無

平水拖藍

石齒泉甘土盡肥龍池沫濺樹林飛尋來碧落爲藍本
滴出青山是翠微水鳥一拳明雪影酒旗十里颺春暉
蕭公堤上從容望九曲真如玉帶圍

龍澗雙闕

石凹隱隱帶龍腥望處西南列西屏曉日映爲雙闕紫
春山括入一囊青刀圭不盡雲霞氣亭毒仍流草木形
券在爐中知也未陀郎祠宇至今靈

卧龍靈應

知在仙經幾洞天神龍長此抱珠眠
籐陰翠染深深月石竇香流細細泉
東野書廻雲欲動南陽人去夢相牽
乘時却爲蒼生起蕭鼓聲高報有年

三嶝雲峰

石級層層到碧空飄然襟袖冷然風
霏微烟雨三天上傲睨河山一氣中
絕嶝懸來雲影斷古碑卧處土化融
倘攜謝眺驚人句呼吸真堪帝座通

飛虹雨霽

襄陽縣志 卷之二十四
三
橋名奇幻竟如斯四字源流村牧之雁齒排成空外望
鼉梁駕入西中詩神斤鬼斧高懸處海水天風下聽時
虛步都能歸實際公般元妙幾人知

汾流晚渡

草平沙軟路西東舟子招招去不窮極浦攤開雲葉碧
夕陽蹴起浪花紅摹成画本荆關似望若仙人李郭同
我是天涯倦游者烏烏高唱酒旗風

十里荷香

荷葉田田露氣清
花開不讓錦官城
朝霞艷射平畦影
宿水香流古店名
杖履幾逢周茂叔
歌詞猶憶柳耆卿
輪蹄十里薰風路
齊向湖天鏡裏行

巢溪春漲

菴花溪水散春郊
舊有堯民所住巢
帝語偶飛塵一點
野心同鎖水三交
上流飲後清牛口
密葉藏來穩樹梢
不似終南開捷徑
此中佳處有誰嘲

龜山晴雪

望遠山疑九肋形年華歷久見精靈撥開雲氣生虛白
點入天光失太青陰壑常寒冰玉座夜窓堪照藥珠經
道人鉄脚梅花口幾度吞來醉不醒

卧龍覽勝

張曾

一覽衆山心自空高峰撐出碧虛中人驚虎伏千巖秀
路狀蛇盤萬壑通雲氣長噓能致雨澗聲遠聽自生風
含青積翠遙疑回峭壁巉巖看卧龍

賦得月明露冷鶴歸遲

應季考

盧敬丹

雅興天開放鶴亭翩翩踈影下秋屏繪衣早入三公府
流響偏高九子鈴明遠有情吟作賦浮邱善相著爲經
雞群終寓昂霄意不比尋常月露形

龍闕峪

張外

傳聞龍闕幾千秋入峪曾無碧水流人慕三皇惟見嶺
兵連五季不知愁雲飛古洞層層幻花滿懸岩處處幽
縮秀石門堪入画此身疑向洞天遊

又

攬勝無如此勝遊華公廟貌足千秋嶙峋已訝峰巒峻
委折還驚洞壑幽百級登臨通絕頂斷橋飛度轉危樓
晨鐘一發雲烟合疑有神龍聽祝由

巢溪春漲

喬瑞圖

洗耳芳踪尙有溪白蘋汎汎草萋萋遊魚自躍桃花浪
好鳥爭鳴綠柳堤指點殘碑憶舊史徘徊初月印新泥
胸中多少浮沉事悵望高風一破迷

汾流晚渡

襄城郭外古汾川
客立夕陽呼渡船
孤鷺數聲鳴早月
輕帆一片掛蒼烟
蕭堤花柳微茫出
巢父村墟隱約懸
臨泊莫嫌歸路晚
笑尋前渚酒家眠

飛虹雨霽

跨澗卧波果似虹
高拖天半倚晴空
曉來孤峙奔雲外
雨後雙懸落照中
厯落星辰五尺近
往來秦晉一橋通
行人不識神工巧
笑指清波卧螭螭

三澄雲峰

峩峩三嶺插雲端往來行人天際看晚接夕暉藏峻嶺
朝含爽氣籠層巒禪房寂歷松枝老澗道幽深虎豹殘
覓得許公濟勝具煙霞處處任吾餐

和趙明府喜雨韻

張泰來

飛鳥歸來魏豹城隨車甘澍一時傾黍苗沾澤千畦潤
汾水添波兩岸平不向漁郎催急渡先呼野老課深耕
村村傳說龍師至童叟歡迎社鼓鳴

襄陵道中

劉聚郡守

攬轡城南沙路遙
看花芳圃不須招
風流猶愧東坡老
尚與漁人爭渡橋

十里桑田信馬蹄
軟風遲日綠楊西
流鶯似愛春光好
飛向桃花枝上啼

晉橋梅月

四首
七言絕

王梅

吞吐仙風溪水寒
梅魂月影此中看
道人指出人方識
何必會留玉洞丹

三年酒債淡相安
賓主遭逢古所難
瀟洒似梅清似月

裴陽縣志 卷之二十四
三
襟期画出與人看

今古風流各不群
詩人仙客亦何分
高談朗朗噴明月
隱有梅花香可聞

仙踪隱隱繫愁思
誰憶仙跡未有時
道士三年豪飲興
溪山曾不異今茲

雨後勸農

趙懋本

甘霖霑足遍郊原
露冕巡行日未暄
舉趾有人耘綠野
晚犁無地不烏犍
傾觴犒飲沿村醉
饁食摩肩繞路諠

從此盈寧先得兆咸歌豐穰逐迴轅

詞擒昌邑乘載先賢數人各拈小詞詠之白墮得附亦列傳收方技之意也調寓憶仙姿

席老師

萬樹

天子門生榮矣此老門生天子傳姓不傳名擊壤一歌而已高士高士只合逃名如此

巢父

不讓有虞風動將聽胤朱鬮訟洗耳結巢栖巧避此生無用樊仲樊仲贏得一牛名重

張良

秦怨自應難道韓祚也知終斷六國印旋銷豈是爲韓
高算歸漢歸漢只了一推公案

賈逵

父子賢奸全異一地兩般竒事梁道自醅儒却以賈充
爲嗣安世安世乃是張湯之子

鄧攸

存姪棄兒堪憫買妾得甥尤苦天豈果無知留得一名

千古房杜房杜有後轉領門戶

劉白墮

古說杜康儀狄釀法不傳今日桑落對紅蕖惟爾鶴觴
如密歡伯歡伯莫謂酒家微術

襄陵縣志卷之二十四

新增詩

深秋

楊維棟

邑人

深秋白露垂涼風砭余肌
布袍縫旋綻遊子待授衣
側聞茅簷下夜窻理殘機
痴夢歸鄉郡單身投柴扉
飢寒呼父母涕洟如嬰兒
悲聲驚夢覺依稀有鳥啼
清明過巢溪見田者用許太空韻

榆柳影交加晃漾魚攻壁
緬然無懷公古風還堪繹

夏陽集卷之二十四
沿途訪高踪仰止覈名實多應悲前賢相繩一何切
熙熙原上田桔槔成舊業噴薄逸林端翠條落明瑟
悠悠路傍人我亦事的皦

秋懷

濛雨正懷人日夕秋復晏鄰鐘風煙外黃蘆披兩岸
借問停舟處雁唳楓葉散蘭東將寄誰坐起忽長嘆
我欲出門去積潦渺河漢我欲高卧去水簟涼如灌
肝胆原無多因此反成礙樽酒何能爾憂思割一半

雜感

仙子牽白鹿約我水雲外我疑未能往銅履棄滄瀨
塵心日時增緩緩失幽介滑滑注逝波未覺雲中快
偶披篋中書違心不堪噦叻叻在何所清爽擬天籟
欲往何得爾反覆真無賴

飲酒

槐花點清池吐吐汚牛口欲落半未落懸空未覺醜
與子坐水閣把杯無言久一飲期酩酊醉來舞雙手

持手向人前陳辭顏何厚悠悠千秋業與子常相守

古意 三首

烟雨滿春梨無地種相思拾得青杏子教儂亦皺眉
郎愛芙蓉花南塘花最深不知妾心苦那解惜花心
夜寒頻剪燭王孫酒未醒雞鳴清霜下莫怨妾無情
餞春陔譚邑侯榮調河津詩

柴友芝

邑人

興文教

獨振文翁化荒郊闢草萊

姑汾書院向乏經費下車後卽捐廉以爲山長修金

諸生膏火現復捐廉貳百兩勸紳士共捐銀壹千門
貳百兩以爲長久之計五年內共捐銀貳千兩

前成李蔭

一時會課者咸知名士生童不下百餘人前後兩科皆有獲雋者稱盛事焉

爨

下識桐材

余濫竽山長而自媿謏陋莫補高深

玉向藍田種珠從合浦

來

隣邑聞風亦有應課者

登龍欣在望多士願追陪

河津爲古龍門

蘇困窮

杼柚民財竭孤身任怨勞

邑之兵差協濟霍州詳請折價每年省錢無算團鍊

器械旗幟皆由捐俸措置得法民樂從事

新恩消虎苛

撫差紅毡探馬諸費盡行裁去

舊

敝息鴻嗷

倉谷無力繳完者俱行豁免孤寡者盡行指名賑濟

宦蹟平河壯官

聲姑嶺高口碑千載在四埜沐郁膏

守清廉

卓異標三晉頭銜兩字新

本年撫憲大計通省卓異第一

野多馴雉

化

狠害極多不入於境

門少饋魚人

私謁一概不通

澤沛千家雨心清

兩袖塵從茲乾壁道遺愛結斯民

深撫字

父老攀轅切

遮行旌者數萬人

離情載路傳

設香案者數十里前後邑侯未

有盛於斯者

殷勤千尺水澹泊一文錢荷里吹香日

邑之入景

內有十里荷香
棠陰話別年
回頭相慰藉
何日不青天

查災雜紀

光緒三年八月二十八日

郝登雲

匹馬馳來東復西
傷心最是此蒼黎
名非飾義甘薇

蕨卦未逢凶據蕨藜

田野間男婦三五成群掃蕨藜挖草根者所在皆然

哆口

似蠶爭食葉

諸木樹葉採食殆淨

曲腸如蚓半含泥

甚有食乾土者

而

今世態開生面好醜雖殊菜色齊

呼張喚李暫開衙
吏役排班子細查
謹奉科條分次

第強緣肥瘦判生涯

分極貧次貧

題門有字甘凡鳥

門上書貧

民字

樣 註冊無名作怒蛙

有非貧民而刪除者爭之幾欲攘臂

垂首自憐

還自嘆冷官何以報

皇家

嶺梅將放菊初殘
大地風光逐日看
人比黃花形更瘦
野無青草歲將寒
餐英作食從權易
披草爲衣返古難
屈指光陰驚轉眼
幾回搔首幾長歎

鑿井耕田擊壤詞
胡今鼓腹盡啼飢
青天有意休搔首
赤子無知浪蹙眉
召癘總歸人事謬
好生方賴帝

心慈從今早作回頭想俗自敦龐福自貽

水村山郭駐行旌里老紳衿夾道迎官愈微時偏作
態學經荒後更矜情疏窻浸月增寒色老樹驚風作
怒聲最是秀才多狡詐搜竒問字夜三更

古道崎嶇暮色寒坡如峻坂走如丸車經覆轍翻身

易馬勒臨崖駐足難

由宋村到中梁村路經高坡馬逸車覆幾遭不測

眼底

風雲爭下達耳邊人語祝平安這回幸得身無恙遣

物猶憐一冷官

冷齋紀事

典盡春衣更換貂昨朝已度度今朝米空瓦甕連塵
掃柴伐花枝帶葉燒充耳不聞荆婦嘆低頭偏讓膳
夫驕而今別受夷齊戒楊腹工夫勝折腰

述懷

不立巖廊不澗阿是儒是吏是頭陀客嫌暑冷交情
淡鳥惜人孤別調多百感都從閒裏積一年半向夢
中過青氍藉作蒲團坐好唱先生踏踏歌

幾回追想幾躊躇
慚愧今吾異故吾
廿載光陰同逝水
一行作吏但徒鋪
詩因解悶隨風捕
酒爲消愁逐日沾
回首平生歌負負
雪花飄落滿頭顱

頭腦冬烘面目奇
自嗤人地兩相宜
算來職業殊鞅掌
論到生涯但蹙眉
萬事無如窮易困
一生惟有俗難醫
偶然抒寫牢騷句
說與同人共解頤

遊龍子祠

鄧惠

邑人

清音亭上好風光
洞達真生六月涼
我欲盃傾陶令

酒詩成醉卧聽滄浪

搜羅古蹟孰留餘殿閣成聯辨
自有客識丁翰隸
篆葫蘆依樣學抄書

古院深沉鎖舊愁閒來到此喜登樓
推開戶牖清風入萬疊雲山豁遠眸

高樓洞達厰瓊筵比戶鱗脰俯目前
樽酒喜開詩世界有人稱是望中仙

源探山曲幾回看躡石披荆路
屈蟠蟻穴蜂房隨地

湧涓涓細滴不勝寒

珠跳細響是源頭
數武才過湧大流
灌溉同稱神澤
沃不知旱潦祇豐收

石上土敷石下泉
安排妥貼自何年
農家最利千塍
韭種植功成上上田

郊遊雜詠

光緒六年夏月偕友人遊郊外見黃雲遍野翠稻連疇迴憶三四兩年赤地成災時

令人驚喜欲絕因隨

所見綴詞以記之

徐清瀾

黃雲翠稻遍原田
共說今年勝往年
囑付農人好耕

作但勤人事莫貪天

綠樹陰中野鳥鳴呼晴喚雨復催耕老農不解詩書
語慣向枝頭辨鳥聲

瑞麥如雲遍地黃下男子婦共登場場邊野老逢人

話慎勿寅年吃卯糧

自遭大稔後家家務
留餘粟不肯盡售

事非經過不知難從此人情改眼看惟有西疇傭作
者嫌人每飯不加餐

傭工身價較昔增倍且飲食必
求豐腆稍不如意卽辭去矣

送慶明府

特庵

調任之高平

十載神山治已成

曾由浮山
調高平

陽春有脚遍春生官臨

去日方形愛政到和時乃見平行李一肩琴共鶴約
身三字慎兼清爲霖久慰蒼黎望快覩兒童竹馬迎
襄陵道中有感

隱隱鄉邦結寸腸備荒有策等無荒隴頭已帶葱菁
綠人面全消菜色黃飢溺心同霖雨切農桑課併歲
時忙

皇仁漸被千家足子惠元元頌爾康

舊跋

趙景祿

邑人

周禮列國有史所以闡章程昭物采表儀文明軌範也
今之郡邑古之列國也豈無記載者乎故志作焉在天
下有一統志在省藩有通志在郡邑各有志且志之作
才非雋永學非淵宏識非精鑑者不足以語此吾襄之
志作於憲廟御極之丙午迄今八十載餘世違蹟湮闕
漏未備者班班也吾侯敬齋翁抱唐虞之大道貫天人
之實學德操孔孟才貌伊周應宿持檄尹茲最邑不期

年而政成化洽乃注意典籍因覩舊志而嘆曰志有未
備則政教無稽文獻何徵殆史家之闕典也烏乎可於
是詢茲庠彥之博識者若王生騰輩八士指示條目教
詔方畧真良史之家法也又命余總裁其事顧余謏薄
固陋愧乏班馬之識徒慙管蠡之窺自量無補辭命弗
獲遂偕諸彥補塞殘缺月維及期乃編成帙事以實書
詞不華飾是是非非鬼神可鑒而百年之公論炳若日
星俾後之觀者指曰某宦業之盛某節義之高某儒術

之深風俗之轉移政治之隆替必有感發而興起者焉
然事跡之始末固有大觀者以揄揚之矣茲不復贅他
若學校之增脩學田之創置均徭之公審催征之良法
接遞徭民馬以紓力役之困城池包磚石以固封疆之
防大而綱紀之振肅小而條目之森嚴遺愛多端口碑
滿路固在觀風者采焉以爲明天子獻行將明揚褒美
不次顯陟殆非余楮之所能悉也侯諱之韓裔出古鄴
之武安世宦華胄也登乙丑進士敬齋其別號云

跋

襄陵志修於

張卯

邑人

國朝癸丑迄今甲歷一週矣兩值大禋一丁地震凡規制之因革損益人物之芳躅懿蹤其當徵信而傳後者甚夥前歷任邑侯咸有志焉而未逮也今我邑侯趙公以製錦宏材蒞茲彈丸二載以來政通人和百廢具舉乃集邑之諸人士採輯纂修以揚我

朝同文之治以成一邑文獻之興甚盛事也余小子謏陋

何能謬與編摩之列願拜手而颺諸簡末焉曰天下事
不患其難艱鉅弗辭則難者亦易亦不慮其弗成實心
任事則其成尤速夫事有似緩而實急似迂而實切于
治者邑志是矣昔蕭何入關先取圖書班史志地里兼
及民俗邑之有志所以譽治忽而脩省鑒者也一邑之
中天星地紀戶口風俗人物文章无不脩具鑒於星象
可以察妖祥之兆鑒于地紀可以辨三壤之宜鑒于戶
口田賦可以驗盛衰而觀得失鑒于人物而忠孝節義

之行可師也鑒于風俗而好樂无荒之咏如昨也鑒于
人文而春華秋實之藻可采也志之宜隨時纂修也要
矣雖然志文事也承平則修明倥偬則廢閣且卽當久
道化成物阜民安之日而因循者或視爲迂濶而不切
于時務也况志以翼史非三長兼優與心切民瘼者未
易信今而傳後大有補于風教也我侯斯志簡而无漏
詳而有要制則典也質而不俚贍而不穢文則雅也是
非不謬名教攸關體則嚴也至弁言簡端尤惓惓于民

風土俗而于官師三致意焉侯之心切于吾邑之民爲
何如耶其所以子惠吾邑者夫寧有艾耶余小子欣逢
斯盛珥筆其間惟從諸同人采訪而編次之若夫筆削
之精論定之嚴攷核之確則一出我侯巨手復何能贊
一詞但仰體我侯捐俸命梓殫精點定之誠咸焚膏繼
晷以從事是以數月而梨棗以畢余樂觀厥成不覺慨
然興嘆曰志之裨于吾邑也大且永哉獨是向之蒞任
諸公或籌及焉而弗果或將有事焉而輒阻而我侯一

舉詳審精密豈斯文之繼固必待其人耶抑實心任事
弗辭艱鉅故天下事皆无難成者耶余蓋極爲我侯贊
而深爲吾邑幸也

增修縣志跋

謹按縣志創始于前明成化丙午重
修于

國朝康熙癸丑自雍正十年續修後迄
今百數十年于茲矣前邑侯譚公憲
文獻之無徵也將欲起而編輯之事
未果而調河津任矣因嘆天下事作者

固難述者亦自不易究之事無難易
惟視司此事者之識何如耳識其人
而善任之雖難亦易不識人而誤任之
雖易亦難惟我

邑侯錢老父台能知人尤善任人光緒
己卯歲我侯奉檄纂修縣志即于縣
城之聖壽寺設局採訪因以其事屬

我

郝老夫子未數月舉百數十人廢墜之

典燦然大備噫均此事也前何若彼之

難今何若此之易哉非我侯知人善任曷

克臻此然侯之知我夫子也豈自今始哉

前此辨賑時已知之深矣知夫子勤慎

任之以查災知夫子廉介任之以放賑

數年來忘食忘寢我侯勞心于內矢
一公矢慎復得我夫子宣力于外以故俾
千百年不經見之事一旦措之則正施之
則行以視夫他人之竭力經營而終不免
譴責者其舉事之難與易何如哉余不
敏夙荷 垂青兩效奔走于其後仰
見明足以知人者我侯也力足以任事

者我夫子也非我侯不足以知我夫子之
為人非我夫子不足以成我侯之素志古
所稱和衷共濟同寅協恭其即我侯我
夫子之謂也夫茲當剝厥臧事之日謹
綴數語于簡末非敢云闡揚盛美也聊
以寄夙昔景仰之意云爾

邑人梁藍田謹跋